

Ar galv

Gelver a ran an Awen ha war he lerc'h an Dour, an Tan, an Douar hag an Avel. Amañ e Naoned, asamblez gant oberourien varrek ar gwin e c'houlennan digant nerzhioù ar bed-holl dont amañ ganeomp da dest, da skoazell ha da warez.

An Dour

E pep buhez emañ an dour. Reiñ teñv d'ar plantoù a ra. Lakaat a ra ar greunioù rezin da ronta Sklaer evel lagad an naer e oar bezañ ha diverañ evelti o kammigellañ a dreuz ar geot.

An dour a red gantañ ene an traoù !

An Tan

Tommañ korf an den a ra an tan. An hini diwanet diouzh an heol pe diwar ar c'heuneud. O teviñ e kalon ar gwaz hag e kalon ar vaouez emañ ivez. Tan an den a zo breur da dan an heol, an hini a ro nerzh d'ar rezin hag a lak anezhañ da zareviñ.

Tan an heol a lak an traoù da gemm !

An Douar

Dougen a ra an dud koulz hag al loened, ar gwez, ar plantoù, al louzoù, dle kement hini bev war e gein. Magañ a ra ar vuhez en ur reiñ ur stumm da gement tra. Dous e c'hell bezañ dindan seulioù ar botoù pe kaled. Reiñ a ra labour lakaat a ra an dour da redek diwar gorf an den.

An douar eo an dremmwel ma c'hell pep tra dont da wir !

An Avel

Kas ha digas ar barradoù-glav a ra an avel. Sec'hiñ an douar a ra ivez. Dre ar c'hwezh e sav an aezhenn da fronelloù an den. Kemenn a ra dezhañ kalz a ouiziegezh diwar benn an douar. Dre an avel e vez skignet an trouz hag ar c'hwezh, arouezh kentañ da glevet ha da ziskuliañ ar blaz.

An avel a ro boued d'ar spered.

Ar greunioù-rezin a zo bugale ganet warlerc'h eured an Heol gant an Douar. O goad gwech darevet er varrikenn a vo unanet gantañ ivez holl Bugale ar Bed. Dre spered ar Gelted, dre ouiziegezh an Drouized eo bet ijinet ar varrikenn e koad. Enni e veze soubet an hini a oa da zont bev adarre. Kavell ur vuhez nevez eo ar varrikenn. Digemer a raio-hi ar greunioù dastumet ha lazhet gant labour an den. Hanter ur vuhez hir eo marv ar greun. Dassorc'het e vezo ar pep gwellañ deus outo evel ur bugel nevez o tont eus kof e vamm.

Dre hud ar winiennerien, anezho achantourien e vo sevenet an Oberenn veur.

Ra c'hwezho atav warno avel an Awen ! Ra baro atav warno goulou an Awen !

Yec'hed, youc'h ha yaouankiz hirbadus

**da baotred ar gwini, anezho strobinnerien a c'hoarvez dre o labour hud ar
c'hemmadurioù a gas ar rezin da win !**

Ra vo mat an dourenn vurzhudus gwilioudet el levenez !

Ra vo mat d'an dud, ra roio kalon hag huñvreoù dezho !

Dindan an heol Lagad an deiz

Ra vo mat d'an holl !

Ra vo mat d'an holl !

Ra vo mat d'an holl !